

KERWERED

2018



Ohfang

Gundach ihr lieve Reerer Leid
unn die's vielleicht noch werre wolle heit.
Die Reerer Kerb is die beschd Kerb, das is eich jo wohl bekannt,
weil do werd bis mojens frieh mo so richtig getankt.
An 4 Dach im Johr finne ner nämlich in Roth de Ausnahmezustand vor
unn do unne die Straußbuwe feiere die Kerb wie jedes Johr.
Do werd munter uff de Kerweplatz maschert
unn e paar Bier in sich enin geleert.

Jetzt möcht ich eich all nochmo ganz herzlich begrieße
unn eier Stimmung mit de Kerweredtheme hoffentlich net vermiese.
Schä, dass ner sinn so zahlreich erschien,
um paar dolle Geschischdcher hern se griehn.
Üwwer die News aus aller Welt will ich eich jetzt awwer noch ganz kurz berichte,
bevor ner eich do unne mit Wein unn Bier vernichte.

Durch em Putin unn em Trump sei ganzer Stress,
hat mer ach schnell mol die schöne Seide im Läwe vergess.
Anstatt alles in Asch unn Schutt se lehe,
deden se lieber zesamme e Bierche trinke gehe.
Genau wie Russland unn die USA,
kam die CDU unn die SPD ach gar nimmi klar.
Änische konnten se sich erschd net,
obwohl se han so viel geredd.

Unn unser Bojemäschder der kriecht genauso wähnisch hieh
odder hat äner vun eich im ledschde Johr die versproch, frisch verbutzt Mauer zwische
Roth unn Geddebach gesieh???

War nur Spaß, mir han eich jo gäre unner uns unn leide kenner mer eich auch,
weil nur bei uns werd so viel getrunk, dass ner wie de Hasso kriehn so e schöner,
feschder Bauch.

So, lang genuch verzehlt, mir fange mol an,
awwer vorher is unser Mundschenk nommo dran.
De Hasso kreischt glei nämlich mol vor,
fer do unne dene wilde Chor.
Unn ach die Musik spielt uns jetzt e schönes Lied,
dass mer direkt schun was vun eich se here griecht.

Üwungsstunne

Es war um de Summer im ledschde Jahr
unn ich sahn eich...die Geschischd is werklich wohr.
Motiviert vum super tolle Wetter drauß,
sinn die Winter Anja unn die Lorina mo gang vors Haus.

E bissje Audo fahre wollte se zesamme gehn,
fahre kenne vor de erschd Fahrstunn...ach das war doch schen!

Uffm Beifahrersitz die Mudder,
do isses doch geloff wie Budder.
Gesess hat se nämlich näwedran,
um se gucke, was ihr Tochter bei de erschd Fahrstunn schun kann.

Zum Buchholz sinn se gefahr enuff,
es Lorina hot schun e ganz schenes Tempo druff.

Unn no ner Zeit warn se mit de erschde Fahrversuche arich zefriede,
weißhalb se sich han ver die Hämfahrt entschiede.
Zum Glick war do e Schotterplatz, wo se konnte drehe,
um es ledschde Mol de Lorina ihr neie Fahrkünschde zu sehe.

Mit viel Schmagges isses Lorina aus de Parkbucht geschoss,
hat awwer dann uff de **grade Streck** es Lenkrad **in Richtung rechts geloss**.
Es gegelenke no ner Kurv hat se nämlich vergess
unn glei schon schief im Audo gesess.

Gerruggelt hats unn gescheppert...
„Ach du scheiße Lorina, bisch du dann ganz bedeppert?!“
Gehong han se dann ganz schepp am Hang,
unn es is werklich gar nix mehr gang.

Ausgestieh unn ums Audo maschert,
hat die Anja dann de Ernschd der Lage kapert.
„Oa näää...allä komme mer do nimmi raus,
ich ruf mo schnell die Alica an dehäm im Haus!“
Weil de Olaf, der is Mo widder beim Fußball in Nürnbersch gewähn,
immer, wenn mer dene Mo brauch, is der jo net dehäm.

Es Alica hat dann geklingelt in de Nachbarschaft an alle Deere,
awwer es war vun käm Mensch dort was se here.

Plötzlich hat die Anja noch an de Roger gedacht,
wenn der net helfe kann...das wär doch gelacht.

Doch bevor de Roger kumm vorbei is mit nem Seil,
rennt do schon e Jogger vorbei in Eil.
„Hi Anja, is dann alles klar bei eich?
Ei, was schaffe ihr dann do ver Zeich?“

Die Anja voller Schock unn net wissend wie lang se noch ruhisch bleiwe kann...
„Entschuldigung, awwer... wer sinn sie dann?“
„Ei, de Doppel (Walg Christoph), du kennsch doch mich?!“
„Ach jooo, es dud mer läd, klar kenn ich dich!“
Peinlich war de Anja die ganz Sach jo so,
awwer sie war um dene zufällische Helfer ah werklich froh.

Zwischezeitlich wollt de Roger versuche mim Säl sei Glick...
Doch es Audo konnt mer dodemit ned bringe uffs Grade zerick.
Angeruf han se dann de Tobi unns Kurdsche, die kame voller Luschd uff ihre Insatz
mim Unimog vorbei.
„Ohjee, was ner do gemacht han is jo ned so einwandfrei.
Awwer gar kä Probläm“, saht de Kurt, „das krieg mer schon hiehn,
mit meiner „Fahrzeich-näwe-ninn-Erfahrung“ aus de junge Johre is eier Audo do
schneller draus als ner kenne siehn.“

De Roger hat dann noch näwebei so schä gesah:
„Ei Anja, do bin ich mit de Meike zum Üwe ah als schun gefahr.“

Mit 4 Mann hann se dann es Audo an de äne Seid hochgehob
unn dodebei e bissje gedrickt unn geschob.
Es Audo selbschd hat nur noch gestann links uffm vordere unn hinnere Reife
unn die Anja hat innedrin uffm Sitz langsam versucht ausm Grawe enaus zu drive.
Die Lorina hat nur noch zitternd unn dem Schauspiel zuguggend do gestann
unn wuschd werklich net wie lang se das seelisch noch aushalle kann.

Zum Happy End han die Künschde unn Kräfte vun alle awwer gelangt
unn die Anja hat sich mit paar Kaschde Bier bei de Helfer bedankt.

Die Musik spielt de Lorina, meiner Schweschder, e Lied, das muss in deine Kopp enin
gehe,
noh ner Kurv musche es Lenkrad widder ganz fesched zerick in gradi Stellung drehe!

Ponyunfall

Wenn die Kerb erum is, dann isses widder soweit
unn vor de Tür steht in Roth die Weihnachtszeit.
Am heilisch Owend werd sich dann uffm Dorfplatz getroff
unn gemiedlich de ä oder anner Glühwein gesoff.

De Hahn Fabian unn de Preuß Tim han sich an dem Middach gedacht,
wenn mer es Anna-Luisa net voll griehn, das wär doch gelacht.
Gemischt han se dann e Glühwein mit „e bissje“ Schuss,
noh dem Motto: „ Ach Fabian, do muss mehr enin, das werd de reinschde Genuss!“

Ganz stolz warn se dann uff ihr tolles Werk,
denn es Anna-Luisa hat das naderlich net bemerkt.
Man sahs ihr an, de Alkohol wanderte ins Blut
unn gleichzeitig stieg in ihr ach schon de Mut.

Als es Märe hat die Jung Eva unn ihr Pony gesichtet,
hats das de Annere gleich berichtet.
Direkt kam dann ach schon der dumme Gedanke, es hat net lang gefackelt
unn is mim „große“ Pferd an ihrer Hand näwedran die Friedhofsstroß enuff unn enuner
gewackelt.

Nohm dritte Mol hat die Jaqui plötzlich geschrieh:
„Ohweh, guggend Mol, vielleicht bin ich jetzt zu besoff,
odder kommt das Pony grad ohne die Anna-Luisa angeloff?“
Ma hat se einfach nimmi gesieh,
weil es Anna-Luisa gefloh is fesched uffs Knie.
„Ach du scheisse, das do war jo klar,
die hat do owwe grad voll in de Bodde ingeschlah!“

Nohdem se is so hart geland,
isse uffgesteh unn hat noch kurz geschwankt.
„Ich dacht das Pony bringt dich do owwe um!“
„Ach mach der kä Kopp, das hat nur die anner Richtung wie ich genumm.“
Es Anna-Luisa war naderlich „schwer verletzt“,
weil es hat die Stärke vum Pony völlisch unnerschätzt.

Immernoch voll vun dem alkoholische Gemisch,
wollt se häm gehe unn sich mache e bissje frisch.
Gefall isse uff de Trepp dann ah nochmo voll gesoff,
do war de Heilischowend dann komplett geloff.

Die Musik spielt de Anna-Luisa, unserer Zwiwwel, se Ehr,
wenn doch nur net so viel Schuss in dem Glühwein gewähn wär.

Unglick im Knibbele

Wie ner wisse werd sich unner de Woch jo als mo uffgerafft
unn im Reimsche hart am Strauß geschafft.

Geknibbelt wärn do die Bändcher in harter Arwet alle änzeln droh,
dass mer ne uns an de Kerb so schä kenne gugge oh.

Das Friejhohr is dodebei awwer e klänes Unglick basert,
vielleicht hats der ä oder anner vun eich jo ah schun gehert.
Herend gut zu unn uffgebasst,
sunschd hanner am Schluss noch die Hälf verbasst.

An änem Dach do gabs nämlich e Vorfall in der Stub do drin,
wo mer hat kenne siehn, wie bescheuert mir Straußbuwe als Mol sinn.

Gekrisch han se fer die Bändcher zeszammezebinne vun de Couch aus noh Droht
unn dodeno die Leit vun uns in de Drohtproduktion fordernd gefroht.
„Ohne Droht kenne mir net weiter mache,
do nutze uns ah ke dausend lose Bändcher unn Sache!“

Vum Preuß Tim kam dann sofort zerick: „Ach, das is doch gar net schwer,
komm Fabi, mir hole unser selbschd gebaut Drohtmaschinche her.“
Gesagt getan, do han ses angepackt
unn sinn mit de Drohtmaschin direkt ins Reimsche geschlabbt.

Anzumerke is noch, dass mer dodrin wege de Gefahre eigentlich gar kä Droht klä
mache darf,
was mer bisher ach immer befolgt han schä bewuschd unn ganz brav.

Awwer ohgefang hann se halt im Reimsche de Droht se mache dann,
geruckelt und gequalmt hat die Maschin, dass sich ball kenner mehr getraut hat dran.
Uff de höchst Stuf hat sich das Ding immer schneller gedreht, is jo klar,
kurz druff hat dann e Stick Droht allerdings schon in de Biedinger Anja ihr Kopp
ingeschlah.
Gehockt hat die nämlich uff de Couch näwedran
unn geguggt, was das Ding dann alles so kann.

„Ach du scheisse, wie konnt dann das basere,
mir wollte doch nur unser Drohtmaschin vor alle ausprobere.“

Es Drohtstick hat richtig im Kopp bei de Anja dringestock;
das war e werklich großer Schock.
Die Anja wurd im Gesicht ganz weiß und blass,
das war für se als neies Mitglied bei uns dann doch e Nummer zu krass.

Die Annere fande das naderlich ah alle gar net gut
unn sinn geplatzt ball vor Wut.

Verarztet hann se se dann mit nem Verband uffm Klo,
han das Stick Droht widder eraus gezoh.

Die Woch druff hat de Tim dann zwo Tafele Schokolad mitgebrung
unn die Anja hat's ihm so net weiter üwwel genumm.

„Du Anja“, hat de Tim dann noch gesah, „zwo vun dene eigentlich vier fer dich
gekafte Tafele hans schon net üwwerläbt,
die hann ich nämlich leider dehäm schon allä geschnäckt.“

Die Musik spielt unsre Chaote se Ehr,
wenn doch nur die Drohtmaschin e bissje sicherer wär.

Junggeselleabschied

Basert is noch e Highlight beim Junggeselleabschied vum Ralle,
do misse ner eich jetzt werklich mol irgendwo fescht halle.

In de Näh vun Grünstadt uff nem Weinfescht sinn se unnerwegs gewöhn
unn de Hildemann Dennis war debei, der die Geschischd basere geloss hat so schön.
Alle warn se dort schon so ziemlich betrunken,
awwer em Hildemann hats ohne Zigarette gestunken.
Die Schachtel war nämlich komplett leer
unn er hat sich gefroht: „Wo griehn ich dann do mei Zigarette her?“

Losgeschlendert isser dann einfach mo irgendwo hieh,
„Mo gugg, wo ich do e Zigaretteautomat sieh.“
Vun de Annere isser dann eweg gang vollgesoff
unn, ohne se wisse wohieh, mo durch die Geschend geloff.

An Stroße, Häuser unn Wiese isser komm vorbei,
awwer „Ach du scheisse, was is dann das ewei?“
Knack und Platsch hats do unner seine Fieß gemacht,
das war e werklich arich lauter Krach.

Vun Kopf bis Fuß war de Hildemann jetzt plötzlich komplett nass,
so wie als wärer gefall in e großes Wasserfass.
De Hildemann hat werklich net gewuscht, was do is basert
unn hat uffämo ah schon Stimme gehert.
Im Haus direkt näher ihm is dann noch angang es Licht,
was em Hildemann zum Glick gebb hat e besseri Sicht.

„Oh Gott, ich bin jo in nem große Pool,
das is jo jetzt echt net so cool.“
E dünni Holzabdeckung war do drüwwer gewän,
wo de Hildemann geloff is druff mit seine Bän.
Im Vollsuff isser in nem fremde Garde geland
unn muscht jetzt erscht mol gucke wie er wirrer kommt üwwer em Pool sei Rand.

Awwer bevor die Bewohner komme konnte aus ihm Haus,
war de Hildemann aus dem Pool Gott sei Dank schon draus.
Voller Adrenalin im Blut hat er alles ausgeblend
unn is efach nur noch aus dem Garde gerennt.

Alles annem hat getropfst unn war mit Wasser voll
unn de Hildemann hat gefroht wie doll.
Ohne se wisse wo's widder geht do lang,
isser einfach weiter e paar Meder durch die Geschend gang.
Die Annere hat er werklich schon vermisst
unn hat ah net gewuscht wo das Weinfescht dann widder ist.

Plötzlich wie vun Gott geschenkt,
hat de Reisebus in seiner Näh ingelenkt.
Gerennt is de Hildemann do ganz schnell emol hieh,
„Mo gugge, ob ich do mei ganze Kollege widder sieh.“
In de Bus hat er sich schon Mol eningesetzt,
bis e paar Minute später sinn die Annere angewetzt.

„Ei Hildemann, was hasch du dann widder gemacht,
du hasch de halve Owend jo wo annersch vebracht!“
„Was mir baseert is das verzehl ich eich glei,
jetzt muss ich mich erschdmol vun dem Schock erhole ewei.“

Die Musik spielt em Hildemann se Ehr,
üwwers Wasser lafe, wie Jesus, is dann doch e bissje zu schwer.

Fehldruck

Es war an nem verrände Dach in dem Johr,
do is mer liewer im Haus blieb, dass mer net hat so gefrohr.
Das Gleiche hat sich ach es Biedinger Nicki gedenkt
unn hat de Fokus ihrer heutige Arwet mo uff ihr Büro gelenkt.

Uffrahme wollt se dene Raum emol im Haus,
weil do konnt ah mo so einischer Schrott enaus.
Alles hat ah soweit ganz gut geklappt
unn die Nicki hat sich zum Schluss nur noch schnell e paar weiße Blätter geschnappt.
Ufffülle wollt se de Drucker mit Babier nämlich noch grad,
sonschd kann de Roger am Owend nix drucke, „Ei, das wär doch schon schad!“

Als de Roger nämlich is vun de Arwet häm kumm gefahr,
do hat die Nicki ah glei schon zum gesah:
„Roger, denk noch droh die Bescheinischung vun unserm Jahresinkomme fer die
Krankekass auszedrucke heit,
dass die Leit vun de IKK dodrüwer mo wisse Bescheid.
Die brauche das nämlich fer so bestimmte Sache,
sodass se kenne weitere Dinge mache.
Weiß Babier hann ich heit Mittag ah schon in de Drucker geleht,
sodass es jetzt ah glei zur späte Stunn e bissje schneller geht.“

„Ei Nicki, das is jo gut se wisse,
dass mer das jetzt nimmi mache misse.“

Ausgedruckt hat de Roger die Bescheinischung dann glei,
awwer, ach du scheisse, was kommt dann do ausm Drucker ewei.
-Jahreszeugnis, Meike Biedinger, Klasse 12- hat do ganz owwe druff gestann
Unn unnedrunner isses dann mit de ganze Fächer unn Note weitergang.

„Oa näää, das do kann doch jetzt net sinn,
manchmo froh ich mich echt, ob ich noch ganz sauwer bin.“

Rumgedreht hat die Nicki das Zeugnis, das ewe ausm Drucker kumm iss dann,
um se siehe, ob was an dem gude Stick war jetzt dran.
Ach du scheisse, eijo, hinne war jetzt es Jahresinkomme schä uffgedruckt se siehe,
„Ei, das wärre mer nie wieder do eweg griehe.
Do hann ich beim Nohlehe vum weiße Baber jo werklich de Meike ihr Zeugnis
mitgegriff ver in de Drucker rinn,
oa Gott, wie verpeilt kann mer dann sinn.“

Awwer was solls, die IKK griecht jetzt mol de Meike ihr Note
unn es Meike hat in de Schul griecht e paar beglaubigte Kopiee angebote.
Sahn muschd se dort: „Ich han mei original Zeugnis verlор“,
weil die anner Geschischd, die hāt jo kenner gehall fer wohr.

Die Musik spielt de Nicki jetzt e Lied,
wenn se beim nächschde Mol doch nur es richtige Babier se greife griecht.

Baustelleverbot

Net weit weg von do, die Stroß enuff,
do wohnt e junger Mann, der hat's handwerklich schun recht gut druff.

An nem sonnische Dach hat sich de Ralle vum Wetter anziehe geloss
unn hat sich mol widder drauß zum Schaffe entschloss.
Wenn mer das riese Grundstick sieht, is jo ah noch e Menge zu tun,
also kä Zeit sich samschdachsmojens auszuruhn'.

Also raus bei Zeit, das is doch gelacht,
„Do kriehn ich üwwer de Dach mei Projekt ferdisch gemacht.
Die Schaufel unn de Biggel in de Borrem geschlah
unn zwä Stunn e Loch ausgehob, ich kanns eich sah.“

Wenn mer'm so zuguggt, de Bub is schun geschickt,
kurz druff hater mit aller Kraft schun die Beddongmaschin in de Garde gedrickt.
Sei Ziel, das will er net aus de Aue verliere,
„Heit dun ich de Poschde fer es Hofdoor inbedoniere!“

„So, Los geht's“, denkt sich de Ralle, „jetzt müsse mer nur noch e bisje Zement
unn Kies in die Bedongmaschin knalle.
Dann mit Wasser ordentlich vermische losse
unn dodemit wird das Loch dann um de Poschde rum ausgegosse.

Das war schnell erledigt, alles hat subber geklappt
unn jetzt wird einfach der Poschde in die Matschepampe gebabbt.
Doch dann kommt das was Zeit koschd unn das hatten käner gesahd,
der Poschde soll am Schluss jo ausem Borrem gugge unn zwar kerzegrad.

Mit de Wasserwoh wird das Ding stunnelang ausgericht,
middachs um 5 war beim Ralle dann ah mol e Ende in Sicht.
De Bedong hat langsam gezoh
unn der Poschde is endlich grad stehe blibb, do war de Ralle froh.

Stolz wie Nachbars Lumpi, war der Heimwerker dann,
als der Poschde hat senkrecht in die Luft gestann.

In dem Moment kommt de Weber Heiko vom Spazieregehe die Stroß enuff gewackelt
unn is beim Ralle am Haus vorbeigedackelt.
„Ey Weber“, kreischt de Ralle, „komm mol her zu mir,
allä trinke mahn ich net, trinksche mit mir e Bier?“

Das Wort „Bier“ losst sich de Heiko net zwomol sahn,
genauso wie Fußball unn uff de FCK eruff fahrn.

De Ralle ab, zwo Bier ausem Keller hole, richdisch schä gekühlt
unn hat sich wege seim gelungene Projekt wie de Heimwerkerkönisch gefühlt.

De Heiko awwer guggt um sich unn hat sich so gedacht:
„Na, was hat der dann heit eigentlich do draus gemacht?
Ach, das is mir ach egal, mer brauch jo kä Grund fer e Bier enin se drigge
unn ich trinke ach ohne was se schaffe am liebschde die Digge.
Was ich heit widder gewannert bin,.. awwer das muss ich mache, dass ich net
inroschde!“...
unn geht schnurstracks zu, ...uffem Ralle sei Hofdoorposchde.
De Ralle kommt ausem Haus, awwer es war alles zu spet,
er sieht nur noch wie de Heiko sich mit voller Masse gehe den frisch inbedonierte
Poschde leht...

Was dann basiert is, das war kä Frach...
Ganz klar, der Klügere gibt nach...

De Heiko war eins mim Ralle seim Projekt, das war net schä!
Unn de Weber samt dem Poschde han negsch do geläh!

Das derf doch net wohr sinn, „Sah mol Heiko bisch du voll?
Der steht jetzt in alle Richdunge, awwer nimmi dort hie, wo er soll!
Wenn ich das nimmi grad kriehn jetzt dann kriehsch du e Job, der werd dir net gefalle,
dann kansche 24 Stunn am Dach mei Hofdoor halle!“

„Tschuldigung, es dud mer läd“, sahter zum Ralle,
„kann ich es Bierche trotzdem behalle?“

Der will jo ah net das er sich mim Weber verkracht,
unn hat de Poschde widder gradgerickt, bis kurz vor Mitternacht.

Die Musik spielt em Weber vun Roth,
beim Ralle hasche Baustelleverbot!

Unn jetzt komme noch drei kläne Geschischde,
üwver die ner noch unbedingt Bescheid wisse mischde.

Nummer äns:

Am diesjährige Helferfest ware mer beim Chinese in Lautre esse
unn durfde naderlich uf käne Fall es zahle vergesse.
Hoch war die Rechnung bei 30 Leid nämlich schon,
sodass mer net konnt einfach so komme devon.

De Koch Steffen, unser Kassewart, wollt dann ah grad bezahle gehe
unn mer konnt die Chinese schun alle drumherum um ihn siehn stehe.
Awwer do is dann ah schun de große Schock in ne enin geschoss,
dass er am Liebschde hät dene Owend direkt abgeschloss.
De Steffen, der vun de Kass is de Chef,
hat beim Bezahle vor alle Leit de Code vun de EC-Kart vegess.

Anrufe muschd er dann bei seine Leit dehäm,
dass die in sei Unnerlage gugge unn ne schnell erlöse konnte vun dem Probläm.

Nummer zwo:

Ach de Biedinger Marcel hat was luschdisches getribb,
sodass es geheert in die Red geschribb.

Gefahr isser nämlich mim Fahrrad de Reerer Stich enuff
unn hat awwer griecht einfach kä Tempo druff.
Gestrampelt hat der ohne Ende,
„Oa, ich kann nimmi, ich glab ich muss ball wende!
Das kann doch awwer gar net sinn,
dass ich so arich unsportlich geworr bin!“

De Schweiß is regelrecht schun annem enuner geloff,
so hart hat ihn die Fahrt do getroff.
„Nä, das do du ich mer nimmi oh,
es nächschde Mol is widder es Audo mit Fahre droh!“

No ner gefühlte Ewichkeit warer dene Bersch dann endlich drowwe
unn hat sich das Fahrrad mo ogeguggt im Stehe vun owwe.
Abgestieh isser vum Rad fer e Paus se mache,
do muschder ah schun werklich üwver sich selbschd mol lache.
Gedenkt hat er: „Wie kann mer dann werklich sinn so dumm,
dass mer de ganze Bersch enuff de falsche Gang hat genumm?“
Mit Gang 7 isser nämlich de Reerer Stich ruff gefahr,
dass unser Biedi do außer Atem kommt, ei das is doch ganz klar!

Nummer drei:

Ach am Mittwoch vorm Kerweufbau is noch e schäni Geschichd entstann,
sodass mer se noch spontan in unser Red ufgenommm hann.
Wisse misse ner dodezu, dass mir bei uns zu Euro ach Eier sahn,
dass han mir uns schun so angewehnt unn do is ah nix mehr Komisches drahn.

Uff jede Fall is de Marschall Marcel, unser 1. Vorstand, vor de Kerb frieh mojen ins
Wasgau noch inkaafe gang
Unn heert do ah schun vum Handy de Klingelton Klang.
„Jou Selli, do is de Jung Andreas am Apparat, bische noch fit?...
Bring mo bitte noch zwä Päckcher Kippe fer 7 unn 10 Eier mit!“

„7 unn 10 Eier...?“, hat de Selli nommo gefroht do noh,
wodruf de Andreas, unser Typ, gesaht hat: „Eijoooo!“
Gedenkt hat sich de Selli; „Ei, alles klar...!“
unn hat dene Uftrag direkt genumm mo wahr.

In Roth is de Selli dann mitm Audo glei in em Typ sei Hof geschnerrt
Unn hat vun draus eninn geplärrt:
„Typ, de Eiermann is do vorm Haus,
komm mol bitte schnell eraus!“

De Typ hat sich gedenkt: „Was is dann jetzt do los?
De Selli macht doch eh nur widder Witze bloß!“

Ufgemach hat er em Selli die Deer direkt,
do hat er sich glei mol kurz erschreckt.
Fängt dann awwer herzlich an se lache,
weil mit dem, was de Selli do hat mitgebrung, kann er werkllich net viel mache!

Raache wollt de Typ genüsslich enni glei,
awwer de Selli hatem gebrung 3 Packe, zwo 6er unn ä 10 er, voll mit Ei.
22 Stick an de Zahl warn in de Kadongs gewöhn do drin,
die konnt de Typ dann nur noch haue de ganze Dach in die Pfann eninn.

Die Musik spielt all dene e Lied,
„Danke“, dass mer hat so schöne Sache vun eich se here grient.

Schluss

So mir han's gepackt unn mol widder erledigt,
das wars fer dies Johr mit de Predigt.
Ich hoff ihr han eich amüsiert unn han viel gelacht,
mir hat's ach arich viel Spaß gemacht.

Ich bin mir sicher, die Kerb werd noch e geiles Feschk,
näwer de WM, die mer dies Johr feiere, is die jo die aller beschk.
Es Deitschlandspiel das gugge mer zusamme heit
unn dann werd sich hoffentlich üwwer e Sieg gefreit.
Mit viel Unnerstützung werre mer das packe,
weil mer wolle jo ned ganz so frieh abkagge.

So, jetzt wolle mer das Prachtexemplar, unser Strauß do owwe, noch dafe,
dass ner net müsse an nem Unbekannte vorbei lafe.
Schlaubi Schlumpf, genannt vun uns ach Saufi Schlumpf, soll sei Name sinn,
weil annerschk macht das Ganze jo gar kä Sinn.

Es is dies Johr mo widder e wunnerbarer Strauß mit seine Farwe, gebbens ruhig zu,
was saht dann eigentlich unser Bojemäschder dezu?

Vielen Dank ver das nette Lob,
wenn ewei ah was anneres kumm wär, hätte mer dich vum Kerweplatz geschob.

Erwähne wollt ich wie jedes Johr, dass ner eich net schäme brauche,
wenn ner in unserer schöne Red ufftauche.
Zum Abschluss will ich eich noch belehre,
mir brauche Theme, also lossend ordentlich was basere.

Bevor ich jetzt do nunner schwanke,
wollt ich mo noch e paar Helfer danke...
De zahlreiche Spender, dass do hinne widder Küche steht fer eich,
do kenne ner jetzt mol fülle eier Beich.
Vorallem e großes Danke an es Anna-Luisa unn de Niko, die mir geholf han beim
Schreiwe,
weil sonschk würd ich do ganz schä uff de Streck mit meine Reime bleiwe.
Die Kerwered, die gebts wie jedes Mol im Bierstand se kafe,
do brauche ner noch net mo so weit se lafe.

So, unn jetzt kreischd unser Mundschenk, de Hasso, wie jedes Johr,
do owwe noch e allerletztes Mol vor.

Die Musik spielt de beschk Kerb se Ehr,
wenn doch nur jedes Wochenende Kerb in Roth wär.